

दिनांक 11.12.2025

समय: 18.45 बजे

- राज्य री भजन लाल शर्मा सरकार रा काम-काज रा दो साल पूरा व्हेवण रा सिलसिला मांय काल जयपुर ऊँ न्यारा-न्यारा ज़िलां मांय प्रचार रथ भेज्या जावेला-स्टार्टअप कॉन्क्लेव अर आई स्टार्ट कार्यक्रम ई व्हेला।
- प्रदेश मांय ई साल 6 नवंबर ताई व्ही 296 भर्ती परीक्षावां रा पेपर लीक नी व्ह्या।
- राजस्थान समेत न्यारा-न्यारा राज्यां अर केन्द्र रा राज वाळा प्रदेशां मांय एसआईआर रो दूजो दौर आज पूरो व्हयो।
- आयुष मंत्रालय री ओर ऊँ दूजो डब्ल्यू.एच.ओ. वैश्विक पारंपरिक चिकित्सा शिखर सम्मेलन 17 दिसम्बर ऊँ नई दिल्ली मांय व्हेला।

000

राज्य री भजन लाल शर्मा सरकार रा दो साल पूरा व्हेवण रा सिलसिला मांय 15 दिन रा कार्यक्रम सुरू व्हे गया है। ई रा तैत मुख्यमंत्री भजन लाल शर्मा वां रा दफ़तर मांय कंपाला, टोक्यो, दोहा, म्यूनिक, न्यूयॉर्क, भुवनेश्वर, न्यूजीलैंड, जांबिया, घाना अर नैरोबी ऊँ आया प्रवासी राजस्थानियां सागे बातचीत कीनी। काल राज्य सरकार री ओर ऊँ जयपुर ऊँ प्रदेश रा न्यारा-न्यारा ज़िलां मांय प्रचार रथ भेज्या जावेला। काल ई जयपुर मांय स्टार्टअप कॉन्क्लेव अर आई स्टार्ट कार्यक्रम राख्यो जावेला अर राजस्थान वेन्चर कैपिटल फण्ड री सुरूआत करी जावेला। सूचना प्रौद्योगिकी अर संचार आयुक्त हिमांशु गुप्ता बतायो के जयपुर मांय काल व्हेवण वाळा नवाचार दिवस-स्टार्टअप्स एक्सपो मांय स्टार्टअप्स री प्रदर्शनी माथे सगळां रो ध्यान व्हेला। ई सागे ई आइस्टार्ट राजस्थान कार्यक्रम रा तैत चुणी ज्या स्टार्टअप्स ने फंडिंग रा चैक दिया जावेला। जनवरी, 2026 मांय व्हेवण वाळा 'डिजिफेस्ट' रा तैत राख्यी जावण वाळी हैकार्थॉन ई सुरू करी जावेला।

000

राज्य मांय व्हेवण वाळी भर्ती परीक्षावां रा पेपर लीक व्हेवण ऊँ रोकण सारू बणायी ज्यी खास जांच टीम एसआईटी रा काम ऊँ ई साल 6 नवंबर ताई आरपीएससी, आरएसएसबी अर दूजा संस्थानां कानी ऊँ लीरीजी 296 परीक्षावां रा पेपर लीक नी व्ह्या। एटीएस अर एसओजी रा एडीजी विशाल बंसल आ जाणकारी दीनी। श्री बंसल बतायो के एसआईटी 138 मामला दर्ज कर र 394 आरोपितां ने गिरफ्तार कीना। वे बतायो के लारला दो साल मांय 92 हजार ऊँ बत्ता लोगां ने नौकरी दीरीजी अर 1 लाख 53 हजार ओहदां माथे भर्ती रो काम चाल रह्यो है।

000

राज्य मांय पंद्रह दिन ताई चलायो जावण वाळो सड़क सुरक्षा अभियान आज सुरू व्हयो। ई रा तैत अजमेर मांय जिला कलेक्टर लोकबंधु परिवहन, पुलिस, पीडब्ल्यूडी, स्वास्थ्य अर शिक्षा विभाग ने जागरूकता कार्यक्रम चलावण रा हुकम दीना। कोटपूतली-बहरोड़, सवाईमाधोपुर, बारां अर झुंझुनू मांय ई अहलकार गाड़ियां चलावण वाळां ने फूल अर चॉकलेट दे र यातायात नियमां री पालना करण री अपील कीनी। झुंझुनू सदर रा थानाधिकारी मांगीलाल मीणा बतायो के यातायात नियमां री पालना ही जिन्दगी री हिफाजत रो सब ऊँ असरदार जरियो है।

.....

अजमेर मांय जिला कलेक्टर न्यारा-न्यारा महकमां रा अहलकारां ने ई बारा मांय जाग जगावण वाळा कार्यक्रम चलावण सारू कह्यो।

000

पेट्रोल मांय 20 फीसदी इथेनॉल भेळ र काम लेवण ऊँ कार्बन डाइऑक्साइड गैस उत्सर्जन मांय सात सौ 36 लाख मीट्रिक टन री कमी आई है। सड़क, परिवहन अर राजमार्ग मंत्री नितिन गडकरी लोकसभा मांय प्रश्नकाल रे दौरान आ जाणकारी दीनी। वे बतायो के भारत ने फिलहाल हर साल करीब 22 लाख करोड़ रुपया मोल रा पेट्रोल-डीजल री खरीदी करणी पड़ रही है। श्री गडकरी कह्यो के विकसित देश बणावण सारू भारत ने पेट्रोल-डीजल री खरीदी माथे खर्च कम करणो व्हेला। मंत्री कह्यो के इथेनॉल प्रदूषण कम करता थकां किसानां री आमदनी बधावण मांय मदद करे है।

सुप्रीम कोर्ट रा मुख्य न्यायाधीश न्यायमूर्ति सूर्यकांत न्यायपालिका मांय आर्टिफिशियल इंटेलिजेंस-एआई काम लेवण, विकसित करण अर लागू करण रा बारा मांय निगराणी सारू ए आई समिति ओजू बणायी है। इण रो मकसद न्याय व्यवस्था मांय दक्षता, आसानी अर साफगोई बधावणो है।

000

वोटर लिस्टां रा विशेष गहन पुनरीक्षण-एसआईआर रा दूजा दौर रा तैत 50 करोड़ 96 लाख ऊं बत्ता गणना प्रपत्र बांट्या जा चुक्या है। आ तादाद कुल प्रपत्रां रो 99 दशमलव 98 फीसदी है। आं मांय ऊं 99 दशमलव 59 फीसदी प्रपत्र डिजिटल बणा दिया ज्या है। अंडमान और निकोबार द्वीप समूह, लक्षद्वीप, छत्तीसगढ़, गोवा, गुजरात, मध्य प्रदेश, पुद्दुचेरी, राजस्थान, तमिलनाडु, उत्तर प्रदेश और पश्चिम बंगाल मांय एस.आई.आर. रा दूजा दौर री आज आखिरी तारीख है। गणना प्रपत्र जमा करावण री आखिरी तारीख ई महीना री चार तारीख ही, जिण ने निर्वाचन आयोग बधा र आज ताई कर दीनी ही। 11 राज्यां अर केंद्र रा राज वाळा प्रदेशां सारू वोटर लिस्टां रो मजमून ई महीना री 16 तारीख ने जारी कर्यो जावेला।

000

राज्यसभा मांय राष्ट्र गीत वंदे मातरम् री 150वीं वर्षगांठ रा बारा मांय व्ही चर्चा रो सदन रा नेता जेपी नड्डा जवाब दीनो। वे कह्यो के वंदे मातरम् देश री आत्मा जगावण वाळो मंत्र है, जो देश री संस्कृति सागे जुड़बा रो मौको ई देवे है। नड्डा कह्यो के वंदे मातरम् सगळा ने सीख देवण रो भावनात्मक स्रोत है अर देश ने एका सागे आगे बधावण रो मंत्र है।

000

राज्यसभा सदस्य चुन्नीलाल गरासिया बड़ी सादड़ी ऊं मावली बीचे रेल री बड़ी लेण रो सर्वे करा र देबारी ताई लेण बिछावण री मांग कीनी है। वे राज्यसभा मांय कह्यो के राजस्थान मांय नामी ठौड़ां चित्तौड़गढ़, उदयपुर, नाथद्वारा अर रणकपुर मांय मोटी तादाद मांय सैलाणी आवे है। गरासिया कह्यो के बड़ी सादड़ी-मावली-उदयपुर लेण माथे रा टेसनां माथे मुसाफिरां री तादाद बधी है अर बड़ी सादड़ी ऊं मावली व्हे र उदयपुर ताई चालण वाळी गाड़ियां करीब 124 किलोमीटर रो सफर तैय करे है। वे बड़ी सादड़ी-मावली ब्रॉडगेज लेण बीचे भटेवर-खेरोदा ओवर ब्रिज ऊं दरौली-डबोक व्हेती थकी देबारी टेशन ताई मिलान सारू नुवी बड़ी लेण रो सर्वे कर र रेलवे लेण बिछावण री मांग कीनी।

000

आयुष मंत्रालय की ओर ऊं 17 ऊं 19 दिसम्बर बीचे नई दिल्ली रा भारत मंडपम मांय दूजो विश्व स्वास्थ्य संगठन वैश्विक पारंपरिक चिकित्सा शिखर सम्मेलन राख्यो जावेला। जयपुर रा महाराव शेखाजी क्षेत्रीय आयुर्वेद अनुसंधान संस्थान रा प्रभारी सहायक निदेशक डॉ. बी. आर. मीणा बतायो के शिखर सम्मेलन ईलाज रा पारंपरिक तरीकां रा साध्य-आधारित एकीकरण ने बधावो देवेला। वे कह्यो के ओ शिखर सम्मेलन स्वास्थ्य, खुशी अर कल्याण सारू ईलाज रा देशी तरीका ने बधावो देवण री कोशिश व्हेला, जो भारत रा "सर्वे भवन्तु सुखिनः सर्वे संतु निरामयाः" रा नजरिया रे मुजब है।

000

राज्यपाल हरिभाऊ बागड़े आज जयपुर रा जवाहर कला केन्द्र मांय जयपुर टाइगर फेस्टिवल रो उदघाटन कीनो। चार दिन रा ई फेस्टिवल मांय 53 स्टॉल्स लगायी ज्यी है जठे राज्य रा पांच खास टाइगर रिजर्व ऊं जुड़्या हलकां मांय देश रा नामी वाइल्डलाइफ फोटोग्राफर्स कानी ऊं खींची ज्यी बाघां री 150 ऊं बत्ती तस्वीरां री प्रदर्शनी लगायी ज्यी है। ई सागे ई वठे टाइगर पेंटिंग अर लाइव स्केचिंग, भारतीय डाक री ओर ऊं डाक टिकट भेळा करण, जूना सिक्कां रो दरसाव, वर्चुअल शो अर कहानियां सुणावण सरीखा केई सत्र राख्या जा रह्या है।

000

राष्ट्रीय ग्राम स्वराज अभियान रा तैत डीग जिला रा तीन हजार ऊं बत्ती आबादी वाळा गावां मांय ई अटल ज्ञान केंद्र खोल्या जावेला। अभियान रा तैत मिलण वाळी रकम ऊं आं केन्द्रां मांय बुनियादी सुबीता, कंप्यूटर लैब अर ई-लाइब्रेरी बणायी जावेला। आं केन्द्रां मांय कॉमन सर्विस सेंटर ई व्हेला, जठे सरकारी योजनावां री जाणकारी ई दी जावेला। ई सागे ई अटल प्रेरक लगावण ऊं वठे रा नौजवानां सारू नौकरी रा मौका ई बधेला।

000

चूरु ज़िला मांय सरदारशहर री कृषि उपज मण्डी मांय मूंग अर मूंगफली री सरकारी मोल माथे खरीदी सारु तुलाई सरु व्हे गयी है। ज़िला कलेक्टर इण रो जायजो ले र अहलकारां ने टेमसर अर साफगोई सागे साखां री तुलाई करण रा हुकम दीना।

000

राजस्थान क्रिकेट एसोसिएशन फॉर द ब्लाइंड री ओर ऊं सलूंबर मांय 13 ऊं 15 दिसंबर ताई राज्य स्तर री दृष्टिबाधित क्रिकेट होड़ राखी जावेला। चुंगी नाका सीनियर सेकेंडरी स्कूल मांय राख्यी जावण वाळी ई होड़ मांय आखा राज्य रा दृष्टिबाधित खिलाडी भाग लेवेला।

000

वित्त मंत्रालय बैंकिंग भर्ती परीक्षावां रा नतीजा जारी करण रा बारा मांय खास ऐलाण कीनो है। ई रे मुजब सब ऊं पैली भारतीय स्टेट बैंक भर्ती परीक्षा रा नतीजा जारी कर्या जावेला। ई पाछे दूजा राष्ट्रीयकृत बैंकां अर वां पाछे क्षेत्रीय ग्रामीण बैंकां मांय भर्ती सारु व्हेवण वाळी परीक्षा रा नतीजा रो ऐलाण कर्यो जावेला। आं बैंकां रा सगळा अधिकारी स्तर रा इम्तिहान रा नतीजा सब ऊं पैली दिया जावेला ज्यीं पाछे लिपिक-स्तर री परीक्षा रा नतीजा रो ऐलाण कर्यो जावेला।

000